


**TEZĂUR LITURGIC**  
**6 AUGUST**

**ACATISTUL**  
**SCHIMBĂRII**  
**LA FAȚĂ**  
**A DOMNULUI**



**MOSCOVA, 2020**



# АКАФИСТ ПРЕОБРАЖЕНИЮ ГОСПОДНЮ

**Архиепископ Никон Петин**

## **Кондака 1**

Преобразился еси на горе, Христе Боже,  
показавый учеником Твоим славу Твою, якоже  
можаху, да возсияет и нам, грешным, свет Твой  
присносущный молитвами Богородицы,  
Светодавче, Слава Тебе.

## **Икос 1**

Во всего человека облекшийся, Господи,  
просветил еси на горе Фаворстей естество наше  
и изменением вида Твоего Богосоделал его, тем  
же вопием:

Господи, очисти и наши души к Божественному  
восхождению на гору Святую Твою.

Господи, просвети ум наш, да во свете Твоего  
Лица узрим свет.

Господи, даждь быти и нам самовидцами славы  
Твоея.

Господи, измени и нас изменением лучшим.

Господи, во свете лица Твоего пойдём и о Имени  
Твоем возрадуемся во веки!

## **Кондак 2**

О Господе Спасителе нашем радующемся в день сей, поем песнь в веселии: Аллилуиа.

## **Икос 2**

Слово Божие, нас ради воплотившееся, просвещает земный состав наш, тем же чертог славы будущия зряще, взыдем на гору Господню и к Нему воззовем:

Господи, осияй нас Божественным облистанием Твоим!

Господи, яви нам единый путь лица Твоего.

Господи, возвыси дух наш, да узрим славу Преображения Твоего.

Господи, во свете лица Твоего пойдём и о Имени Твоем возрадуемся во веки!

## **Кондак 3**

Лицы ангельстии, сошедше на гору Фаворскую, трепетно зряще славу Господа, воспевают песнь: Аллилуиа.

## **Икос 3**

Апостоли, горы достигша, яко обители райския, радости исполнишася и возопиша: «

Господи, добре нам zde быти», и мы, подражающе им, вопиём:

Господи, добре нам zde быти с Тобою.

Господи, добре нам с Тобою тамо быти.

Господи, добре нам с Тобою в скорби быти.  
Господи, добре нам с Тобою во славе быти.  
Господи, добре нам с Тобою в смерти быти.  
Господи, добре нам с Тобою и по смерти быти.  
Господи, во свете лица Твоего пойдём и о Имени  
Твоем возрадуемся во веки!

#### **Кондак 4**

Высоту небесного жития и славы  
присносущныя, Божественное сияние даруй  
рабом Твоим, празднующим Твое Преображение  
и поющим песнь: Аллилуиа.

#### **Икос 4**

Уподобися гора Фаворская селению райскому,  
светлостью солнечною сияющая и землю всю  
озаряющая и всех вопити научающая:

Господи, сподоби со Апостолами ныне Тебе  
поклониться.

Господи, даждь нам молитвами просветиться.

Господи, даждь Твое светлое Преображение  
верою узрети.

Господи, даждь силу его дивно воспети.

Господи, во свете лица Твоего пойдём и о Имени  
Твоем возрадуемся во веки!

#### **Кондак 5**

Твоей, Христе, славе непостижимей Апостоли  
дивляхуся и радостно пояху песнь: Аллилуиа.

## **Икос 5**

Видеша на Фаворе Моисей и Илия от Девы Бога воплощенного человеком на избавление, с удивлением и радостью взываша:

Господи, Ты еси камень в пустыни разверзший.

Господи, Ты еси море Чермное посекавший.

Господи, Ты еси враном в пустыни люди питати велевший.

Господи, Ты еси Бог, к человеком снизшедый.

Господи, во свете лица Твоего пойдём и о Имени Твоем возрадуемся во веки!

## **Кондак 6**

Отеческого существа сияние вечное, Сыне Божий возлюбленный, доброты благолепие учеником Своим милосердно явил еси, его же не можаху вмещати, воспеша радостно: Аллилуиа!

## **Икос 6**

Юже во двою существу, во Ипостаси Единой, Бог-Слово всему Божеству соедини человечество, наше спасение устрояя, обильно невещественный свет показал, его же со страхом и радостью видевшие, вернии возопиша:

Господи, во свете Твоем наши пути направи.

Господи, сиянием его на стезю правды и истины настави.

Господи, светом Твоим души наши просвети.

Господи, им же естество наше чудне преобрази.

Господи, во свете лица Твоего пойдём и о Имени Твоем возрадуемся во веки!

### **Кондак 7**

Иже купину прикоснувшуюся огню сохранивший неврежденно, Господи, ныне и Богосиянную плоть Твою показал нам, поющим радостно: Аллилуиа!

### **Икос 7**

Илию и Моисея неизреченно осиял еси, стоя посреде Апостолов Твоих, Господи, да Твое покажешь яве неизреченное Второе пришествие, тем же Ти взываем:

Господи, и нам Отеческий глас внуши.

Господи, и нашу волю в Твое послушание приими.

Господи, и нам Божественное житие приложи.

Господи, Твое милосердие покажи.

Господи, во свете лица Твоего пойдём и о Имени Твоем возрадуемся во веки!

### **Кондак 8**

Света от Света, Бога Истинна от Бога Истинна, светом наставляющего тварь, величаем и поем: Аллилуиа.

### **Икос 8**

Узревше мысленно Божество Отца и Духа в Сыне Единородном, блистающе станем вси во

граде Бога живаго и воззовем:  
Господи, и нас любовью Своею привлецы.  
Господи, Божественным желанием нас премени.  
Господи, облаком светлым нас осени.  
Господи, ризы души убели.  
Господи, во свете лица Твоего пойдём и о Имени  
Твоем возрадуемся во веки!

### **Кондак 9**

Сый прежде век, светом, яко ризою одеяйся,  
паче солнца на Фаворе просиял еси, Ему же  
велегласно поем: Аллилуиа.

### **Икос 9**

Естество человеческое воспринял еси, Господи,  
Божеством Своим просветил его, сего ради  
благодарственне вопиём:  
Господи, светоносную благодать нам вдохни.  
Господи, помыслы мудрыми нас осени.  
Господи, любовь Своею нас посети.  
Господи, благодатию Твоею нас освяти.  
Господи, во свете лица Твоего пойдём и о Имени  
Твоем возрадуемся во веки!

### **Кондак 10**

Хотя явити славу Твою, на горе преобразился  
еси, Христе, да уразумеем страдания Твоя  
вольная и воспоем Ти песнь: Аллилуиа.

## **Икос 10**

Разумом Божественным наставляя, сиянием просвещая, света жилище боголепно явил проповедником Твоим, Господи, да егда Тя узрим распинаема, мужественно воззовем: Господи, от грехов освободи.  
Господи, от клятвы искупи.  
Господи, от вечныя смерти спаси.  
Господи, во Царствии Твоем помяни.  
Господи, во свете лица Твоего пойдём и о Имени Твоем возрадуемся во веки!

## **Кондак 11**

Исхода Твоего, Господи, ужасохуся пророцы и Апостоли и в трепете воспеша: Аллилуиа.

## **Икос 11**

Согласно славяще Преображение Твое, Господи, от бури отчаяния спасаемся вси. Надежду славы чад Божиих, яко основание души, тако взывающим сохрани:  
Господи, во веки благословенный.  
Господи, над всеми превознесенный.  
Господи, Ангелы радостно певаемый.  
Господи, на земли человеками благодарне славимый.  
Господи, во свете лица Твоего пойдём и о Имени Твоем возрадуемся во веки!

## **Кондак 12**

Троичное явление на Фаворстей горе Апостоли видевше, радостно возопиша: Аллилуиа.

## **Икос 12**

Единородного от Отца славу зряще, духом совозвышающесея, благочестне радостно воспоим:

Господи, на высоту добродетелей вознеси.

Господи, просвещение Твое источи.

Господи, мое естество светлостью Божества Твоего просвети.

Господи, во свете лица Твоего пойдём и о Имени Твоем возрадуемся во веки!

## **Кондак 13**

О, Иисусе Христе, на Фаворе ради нас преобразивыйся, Божественныя Твоя славы причастники и нас сотвори, да и мы во свете лица Твоего пойдём и непрестанно верою воспоим: Аллилуиа, Аллилуиа, Аллилуиа!

